

UREDBA O POSTUPKU FINANSIRANJA DIJELA MINIMALNE MJESEČNE NETO PLAĆE (U FBiH) ZA MJESEC APRIL I MAJ 2020. GODINE*

(“Službene novine KS”, broj 21/20)

Član 1.

(Predmet Uredbe)

Ovom uredbom uređuje se način raspisivanja javnog poziva i rješavanje prijave, kriteriji za isplatu i način finansiranja dijela minimalne mjesečne neto plaće (u FBiH) za mjesec april, odnosno maj 2020. godine, isplata sredstava, postupanje općina i pravna zaštita poslovnih subjekata koji apliciraju na javni poziv.

Član 2.

(Javni poziv)

(1) Za finansiranje dijela minimalne neto plaće (u FBiH) za mjesec april i maj 2020. godine Ministarstvo privrede Kantona Sarajevo (u daljem tekstu: Ministarstvo privrede) raspisuje javni poziv.

(2) Javnim pozivom iz stava (1) ovog člana pozivaju se poslovni subjekti koji ispunjavaju uslove propisane ovom uredbom da podnesu prijave za ostvarivanje prava iz stava (1) ovog člana.

Član 3.

(Prijava na javni poziv)

Poslovni subjekti, koji se prijavljuju na javni poziv, obavezni su dostaviti prijavu i dokumentaciju propisanu javnim pozivom iz člana 2. ove uredbe.

Član 4.

(Obrada prijava)

Pregled prijave i dokumentacije, obradu i kontrolu podataka, te ocjenu o ispunjavanju uslova vršit će stručna lica imenovana rješenjem ministra Ministarstva privrede.

Član 5.

(Isplata sredstava)

(1) Za poslovne subjekte koji ispunjavaju uslove Ministarstvo privrede priprema naloge za isplatu sredstava i iste dostavlja Ministarstvu finansija Kantona Sarajevo na realizaciju.

(2) Na osnovu naloga iz stava (1) ovog člana Ministarstvo finansija Kantona Sarajevo vrši isplatu sredstava poslovnim subjektima.

Član 6.

(Subjekti koji su isključeni iz finansiranja dijela plaće)

Sljedeći subjekti su isključeni iz finansiranja dijela minimalne mjesečne neto plaće (u FBiH) za mjesec april i maj 2020. godine: javna preduzeća, javne ustanove, javne institucije, organi uprave, upravne organizacije, organi i jedinice lokalne samouprave, banke i druge finansijske organizacije (oblasti po KD BiH 2010: 64-66), subjekti koji obavljaju djelatnost kockanja i klađenja, udruženja, te fizička lica koja samostalno obavljaju registrovanu poslovnu djelatnost, a koja u skladu sa propisima o porezu na dohodak, porez na dohodak po tom osnovu plaćaju prema paušalnom utvrđenom iznosu.

Član 7.

(Uslovi za ostvarivanje prava na isplatu dijela plaće)

Pravo na isplatu dijela minimalne mjesečne neto plaće (u FBiH) za mjesec april i maj 2020. godine mogu ostvariti poslovni subjekti (pravna lica i fizička lica koja samostalno obavljaju registrovanu poslovnu djelatnost) koji ispunjavaju sljedeće uslove:

a) da nije subjekt iz člana 6. ove uredbe, tj. da nije subjekt koji je isključen iz finansiranja dijela minimalne mjesečne neto plaće (u FBiH) za mjesec april i maj 2020. godine,

b) da ima sjedište u Kantonu Sarajevo,

* Uredba je objavljena u “Službenim novinama KS”, broj 21/20 od 4. juna 2020. godine, a stupila je na snagu 5. juna 2020. godine. Uredba je donijeta na osnovu člana 2. stav (2) Zakona o ublažavanju negativnih ekonomskih posljedica i uštedama u Kantonu Sarajevo (“Službene novine Kantona Sarajevo”, broj 18/20).

c) da se poslovna jedinica poslovnog subjekta sa sjedištem u Kantonu Sarajevo ili sa sjedištem izvan Kantona Sarajevo na području FBiH nalazi u Kantonu Sarajevo, ako poslovni subjekt u svom sastavu ima poslovnu jedinicu,

d) da je u mjesecu aprilu 2020. godine, odnosno u mjesecu maju 2020. godine imao pad prometa u odnosu na prosječni mjesečni promet u 2019. godini, kako slijedi:

- 1) veći od 40% do 70% ili
- 2) veći od 70%,

e) da do dana objave javnog poziva ima izvršene obaveze po osnovu javnih prihoda sa danom 29.02.2020. godine i

f) da je zadržao isti broj uposlenika na dan 30.04.2020. godine, odnosno na dan 31.05.2020. godine u odnosu na dan 29.02.2020. godine, osim onih radnika kojima je istekao ugovor o radu i/ili koji su sporazumno prekinuli radni odnos.

Član 8.

(Maksimalni dio plaće koji se može isplatiti)

Poslovnim subjektima koji ispunjavaju sve potrebne uslove za mjesec april, odnosno mjesec maj 2020. godine može se isplatiti dio minimalne mjesečne neto plaće (u FBiH) po uposleniku, kako slijedi:

- a) do 50% minimalne mjesečne neto plaće (u FBiH) za subjekte koji imaju pad prometa veći od 40% do 70%,
- b) do 100% minimalne mjesečne neto plaće (u FBiH) za subjekte koji imaju pad prometa veći od 70%.

Član 9.

(Utvrđivanje iznosa dijela plaće za isplatu)

Vlada Kantona Sarajevo (u daljem tekstu: Vlada Kantona) će posebnim aktom utvrditi iznos dijela minimalne mjesečne neto plaće (u FBiH) iz člana 8. ove uredbe za mjesec april, odnosno za mjesec maj 2020. godine.

Član 10.

(Objava listi poslovnih subjekata)

(1) Ministarstvo privrede objavljuje Listu poslovnih subjekata koji ispunjavaju uslove, kao i Listu poslovnih subjekata koji ne ispunjavaju uslove.

(2) Liste iz stava 1. ovog člana objavljuju se na web stranici Ministarstva privrede: <http://mp.ks.gov.ba/>.

Član 11.

(Pravna zaštita)

(1) Poslovni subjekt iz člana 10. ove Uredbe može uložiti prigovor komisiji putem Ministarstva privrede, u roku od sedam dana od dana objave listi iz člana 10. ove uredbe.

(2) Komisija rješava po prigovoru iz stava (1) ovog člana najkasnije u roku od 60 dana od dana podnošenja prigovora poslovnog subjekta.

(3) Komisiju iz stava (1) ovog člana imenuje Vlada Kantona na prijedlog Ministarstva privrede.

Član 12.

(Postupanje općine)

(1) Općina koja sa Vladom Kantona zaključi Sporazum u kojem je uključena i obaveza općine za finansiranje dijela minimalne mjesečne neto plaće (u FBiH) za mjesec april i maj 2020. godine fizičkim licima koja samostalno obavljaju registrovanu poslovnu djelatnost na području općine:

a) raspisuje javni poziv iz člana 2. ove uredbe za fizička lica koja samostalno obavljaju registrovanu poslovnu djelatnost na području općine,

b) donosi rješenje o imenovanju stručnih lica koja izvršavaju obaveze iz člana 4. ove uredbe po javnom pozivu iz tačke a) ovog stava,

c) vrši isplatu sredstava iz člana 5. ove uredbe po javnom pozivu iz tačke a) ovog stava, i

d) po javnom pozivu iz tačke a) ovog stava objavljuje liste iz člana 10. ove uredbe, na web stranici općine i Ministarstva privrede.

(2) Poslovni subjekti iz stava (1) ovog člana ostvaruju pravnu zaštitu po članu 11. ove uredbe.

Član 13.

(Stupanje na snagu)

Ova uredba stupa na snagu narednog dana od dana objavljivanja u "Službenim novinama Kantona Sarajevo".